

PERTANDINGAN BERBALAS PANTUN MERIAHKAN PELANCARAN BUKU PANTUN KELPEN DI PESTA BUKU LABUAN 2025



Labuan, 26 Jun 2025 – Suasana penuh gemilang dan sarat nilai warisan budaya mewarnai malam pelancaran Buku Pantun KELPEN yang berlangsung di Pentas Anggerik, Ujana Kewangan Labuan sempena Pesta Buku Labuan 2025. Majlis yang bermula jam 7.30 malam ini diserikan dengan Pertandingan Berbalas Pantun Peringkat Negeri yang menampilkan kehebatan seni kata empat pasukan mewakili Rumah Kuning, Biru, Hijau dan Merah.

Acara berprestij ini dirasmikan oleh Penasihat Kelab Pendidikan Labuan (KELPEN), Encik Yahya Ahmad Puteh yang turut menzahirkan ucapan tahniah kepada semua peserta atas komitmen dan semangat dalam memartabatkan seni warisan Melayu. Turut hadir ialah Pengerusi KELPEN bersama-sama barisan ahli kelab yang memberikan sokongan padu terhadap penganjuran acara tersebut.



Dalam pertandingan penuh semangat dan kreativiti itu, Rumah Merah berjaya memukau para juri sekaligus dinobatkan sebagai johan dan membawa pulang pingat emas. Tempat kedua diraih oleh Rumah Kuning dengan pingat perak, manakala Rumah Hijau dan Rumah Biru masing-masing meraih gangsa, berkongsi kedudukan tempat ketiga.

Panel hakim yang terdiri daripada tokoh-tokoh berpengalaman dalam bidang bahasa dan sastera – Puan Siti Zaharah Mohammad, Puan Rodziah Abdul Rahman, Encik Hasnan Md Saad dan Encik Yahya Burhanuddin – telah menilai dengan teliti dari segi penguasaan bahasa, kepetahan berpantun, isi pantun serta gaya persembahan.

Pertandingan ini bukan sahaja menyemarakkan semangat cintakan bahasa dan budaya dalam kalangan pelajar dan masyarakat, malah menjadi platform menggalakkan penghayatan seni berpantun dalam konteks pendidikan dan kesusasteraan moden.

Majlis pelancaran buku pantun ini sekaligus memperkukuh peranan KELPEN dalam usaha mendokumentasi, menghidup dan menyemai kecintaan terhadap seni kata dalam kalangan generasi muda dan masyarakat umum.

“Pantun dijunjung, warisan disanjung; generasi mendatang pasti terpanggil mengangkat budaya yang kian terpinggir.”





Pelajar SPM Labuan raih 11A+



LABUAN, 24 APRIL –Moses Yii Xi Hong, 17, dari SMK Labuan muncul pelajar paling cemerlang di Labuan selepas berjaya memperoleh 11A+ dalam keputusan Sijil Pelajaran Malaysia (SPM) 2024 yang diumumkan hari ini.

Pelajar itu merupakan salah seorang daripada 1,133 calon di kepulauan itu yang layak menerima sijil SPM 2024.

Timbalan Pengarah Sektor Pembelajaran Labuan, Yahya Ahmad Puteh, berkata jumlah calon yang layak menerima sijil SPM 2024 di Labuan meningkat kepada 1,133 orang, berbanding 1,041 calon pada 2023.

Beliau yang juga merangkap Pemangku Pengarah Jabatan Pendidikan Negeri Wilayah Persekutuan Labuan berkata ini sekali gus mencatat peningkatan sebanyak 72 calon berbanding 1,041 calon pada tahun sebelumnya.

Katanya, peningkatan ini turut dipengaruhi syarat kelayakan lulus dua mata pelajaran teras, Bahasa Melayu dan Sejarah.

“Kita bukan sahaja memberi fokus kepada pencapaian akademik, tetapi juga memberi perhatian kepada kehadiran murid ke sekolah.

“Gabungan kedua-dua aspek ini membantu kita menikmati hasil yang positif, apabila berjaya mengurangkan bilangan murid yang gagal dalam semua mata pelajaran,” katanya kepada pemberita selepas pengumuman keputusan peperiksaan di Jabatan Pendidikan Labuan.

Sementara itu, Calon Berkeperluan Pendidikan Khas (CBPK) di Labuan mencatat 100 peratus kelayakan menerima sijil.

Antara yang membanggakan ialah Nuralyah Salleh Hussein, pelajar autisme ringan dari SMK Mutiara, yang muncul sebagai calon terbaik dalam kategori CBPK dengan memperoleh 8A dan 1C.

Secara keseluruhan, seramai 1,146 calon sekolah di Labuan mendaftar untuk menduduki peperiksaan SPM tahun ini.

Sumber : Berita RTM

JAULAH MADANI RAMADAN KPM 2025



Labuan, 17 Mac 2025 – Jaulah Madani Ramadan KPM 2025 berlangsung dengan jayanya di Sek Men Agama Majlis Agama Islam WP Labuan (SMA MAIWPL) dan Sekolah Sukan Negeri SMK Mutiara malam tadi.

Ia merupakan aktiviti tahunan Kementerian Pendidikan Malaysia (KPM) sebagai wadah untuk meningkatkan penghayatan Ramadan, menyantuni warga sekolah dan mengeratkan hubungan di antara KPM dengan sekolah, melaksanakan pelbagai aktiviti kerohanian serta menyalurkan sumbangan kepada murid yang memerlukan bantuan.

Program ini diserikan dengan kehadiran YBhg Datuk Wan Hashim bin Wan Rahim, Timbalan Ketua Setiausaha (Perancangan dan Pembangunan), dan Tuan Hj Abidin bin Marjan, Timbalan Pengarah Kanan Bahagian Pengurusan Sekolah Harian (BPSH), Tn Hj Fauzi bin Abdul, Ketua Penolong Pengarah Bahagian Pendidikan Islam dan pegawai - pegawai daripada Bahagian Pendidikan Islam.

YBhg Datuk Wan Hashim bin Wan Rahim beserta rombongan melakukan solat berjemaah maghrib, Isyak dan solat tarawih yang diimami oleh Andik Aniq Aqil bin Andik Zul Azri. Antara pengisian dalam Jaulah Madani Ramadan ialah bacaan ayatul quran oleh adik Awangku Faris Haziq bin Ak Syahrul Razmal, tadabbur Hadis 40 Imam Nawawi oleh adik

Fathulhifzi Faizi bin Abd Fattah dan adik Ahmad Azhad bin Mohamad Ruzaimi.

Turut hadir dalam Jaulah Madani Ramadan ialah Timbalan Pengarah, Ketua Penolong Pengarah, pegawai-pegawai Jabatan Pendidikan Wilayah Persekutuan Labuan, guru-guru daripada SMA MAIWPL dan SMK Mutiara serta murid-murid daripada kedua-dua buah sekolah. Seramai 100 murid menerima sumbangan daripada Yayasan Didik Negara.













**Majlis Khatam Al-Quran
Sekolah-Sekolah Kementerian
Pendidikan Malaysia
Peringkat Wilayah
Persekutuan Labuan Tahun
2024**



Labuan, 19 Disember : Jabatan Pendidikan Wilayah Persekutuan Labuan (JPWPL) telah mengadakan majlis Khatam Al-Quran Perdana bertempat di Masjid Jamek An Nur bagi menghargai usaha 257 murid tahun 6 yang telah tamat atau Khatam Al-Quran 30 juzuk melalui pendekatan kaedah Iqra'.

Majlis yang bermula seawal jam 7.00 pagi ini merupakan acara tahunan yang telah dirancang oleh Sektor Pendidikan Islam (SPI), JPWPL seperti tahun-tahun sebelumnya dengan matlamat untuk meningkatkan penguasaan murid-murid dalam bidang Al Quran seterusnya melahirkan murid-murid yang seimbang duniawi dan ukhrawi.

Majlis Khatam Al-Quran ini diseriakan dengan penyampaian syarahan spontan daie cilik bertajuk 'Al Quran Nur Hidupku' oleh adik Norhanan Nadhirah Ahmad Aizuddin daripada Sekolah Kebangsaan Layang-Layangan dan tazkirah "Ibrah Al Quran"- Wasiat Luqman al-hakim oleh ustaz Ibrahim Mat daripada Sekolah Jenis Kebangsaan Chung Hwa.

Perasmian Majlis Khatam Al-Quran Perdana telah disempurnakan oleh Tuan Pengarah Pendidikan JPWPL, Abidin Marjan.

"Saya amat berbesar hati serta menyambut baik terhadap

penganjuran program seperti ini kerana, ianya dapat memupuk rasa kecintaan terhadap Al-Quran yang mendalam terhadap kalamullah seterusnya memartabatkan Al Quran ke satu tahap yang lebih tinggi.

Saya juga ingin merakamkan setinggi-tinggi penghargaan dan ucapan terima kasih sekali lagi kepada pihak SPI JPN Labuan dan tidak lupa juga semua guru-guru Pendidikan Islam atas dedikasi dan komitmen mereka dalam membimbing anak-anak murid ke arah kecemerlangan.

Peranan anda amat besar dalam melahirkan generasi pewaris yang berilmu, bertakwa, dan berakhlak mulia. Sesungguhnya, jasa anda tidak ternilai dan amat dihargai” katanya lagi.

Majlis turut dihadiri oleh Timbalan Pengarah Pendidikan Sektor Pembelajaran Yahya Ahmad Puteh, Timbalan Pengarah Pendidikan Sektor Pembangunan Murid Ag Marten Datuk Hj Abdul Rahman, Timbalan Pengarah Pendidikan Sektor Perancangan Noraini Hj Sahbudin, Ketua Penolong Pengarah Sektor Pendidikan Islam Kamariah Salim, Ketua-ketua Penolong Pengarah, Guru-guru Besar, Rakan strategik JPWPL daripada Majlis Agama Islam W.P. Labuan (MAIWPL), Jabatan Agama Islam W.P.Labuan (JAWI), ketua kampung Gersik, Pegawai Masjid Jamek An Nur, guru Pendidikan Islam dan ibu bapa murid.









Kolokium Kajian Tindakan

Junior 2024: Pemenang- Pemenang Yang Menginspirasi



Labuan, 24 November 2024 – Kolokium Kajian Tindakan Junior Peringkat Negeri 2024 yang diadakan di Dewan Konvensyen Ujana Kewangan WP Labuan pada 23 dan 24 November 2024 telah berlangsung dengan penuh meriah. Program yang dianjurkan oleh Majlis Agama Islam Wilayah Persekutuan (MAWIP) bersama Jabatan Pendidikan WP Labuan ini bertujuan melahirkan murid sebagai agen perubahan dalam pembelajaran mereka, dengan tema “Transformasi Pembelajaran Melalui Kajian Tindakan: Murid Sebagai Peneraju Perubahan, Kemiskinan Bukan Penghalang Kejayaan.”

Sebanyak 150 murid dari pelbagai sekolah di Wilayah

Persekutuan Labuan telah mengambil bahagian dalam kolokium ini. Mereka menggunakan teknik kajian tindakan 12 langkah yang dibangunkan oleh Puan Suriani Oxley, SISC+ dari Sektor Pembelajaran, Jabatan Pendidikan WP Labuan. Dalam kolokium ini, murid-murid tidak hanya didedahkan dengan proses kajian tindakan, tetapi juga diberi peluang untuk mempamerkan hasil kajian mereka melalui pembentangan dan pameran.

Berikut adalah senarai pemenang bagi Kolokium Kajian Tindakan Junior 2024:

Kajian Tindakan Terbaik Sekolah Rendah:

LUboq JR – SK Lubok Temiang

Bedaun Starz – SK Sungai Bedaun

Sunan Lumya – SK Pantai

Kajian Tindakan Terbaik Sekolah Menengah:

Sinar – SMK Ranche-Ranche

Cendekia Hope – SM Sains Labuan

Atlas Pincanator – SMK Pantai

Pembentang Kajian Tindakan Terbaik Sekolah Rendah:

My Lever 321 – SK Pekan Dua

Pembentang Kajian Tindakan Terbaik Sekolah Menengah:

Al-Insyirah – SMA MAIWP Labuan

Slaid Pembentangan Kajian Tindakan Terbaik Sekolah Rendah:

The Sparkling Diamonds – SK Sungai Lada

Slaid Pembentangan Kajian Tindakan Terbaik Sekolah

Menengah:

Alchemy Pioneers – SM Sains Labuan

Intervensi Kajian Tindakan Luwes Sekolah Rendah:

Bedaun Genius (WDW Card) – SK Sungai Bedaun

Intervensi Kajian Tindakan Luwes Sekolah Menengah:

Jeqaima – SM St Anne

Kolokium ini bukan sahaja menyediakan platform untuk murid berkongsi hasil kajian mereka tetapi juga memberi mereka peluang untuk membina kemahiran dalam pembentangan, penyelesaian masalah, dan pemikiran kritis. Hadiah dan penghargaan kepada para pemenang disampaikan oleh YBhg Tuan Haji Syed Kamarulzaman bin Syed Kabeer, Pengerusi MAWIP, yang turut mengucapkan tahniah kepada semua peserta atas pencapaian mereka.

Dengan sokongan berterusan dari MAWIP dan pelbagai pihak, kolokium ini memberi peluang kepada murid untuk mengatasi cabaran pembelajaran dan memperkukuh keyakinan diri, menjadikan mereka bukan sahaja pelajar cemerlang, tetapi juga pemimpin masa depan yang berdaya saing.













Karnival Langkah Ke Sekolah, Serlah Potensimu



Labuan, 9 November 2024 (Sabtu) – Karnival Langkah Ke Sekolah, Serlah Potensimu telah dianjurkan oleh Sektor Pembangunan Murid, Jabatan Pendidikan WP Labuan. Objektif karnival ini adalah berfokus untuk meningkatkan minat dan motivasi murid-murid hadir ke sekolah serta memberi kesedaran kepada murid-murid tentang kepentingan menjaga kebersihan pantai dan sekitar.

Pelbagai acara diadakan pada karnival ini iaitu Program Let's Clean Our Beach! yakni seramai 140 orang murid dan 35 orang guru pengiring di kesemua sekolah rendah dan menengah Labuan membersihkan Kawasan di pantai Kompleks sukan Laut Antarabangsa Labuan. Sekolah-sekolah yang terlibat dalam program gotong royong ini terdiri dari 4

buah sekolah Ikon 3K -SK Sungai Lada, SK Sungai Lada, SMK Pantai, SK Pekan Dua, SM St Anne dan SKK St Anne.

Program Karnival Langkah Ke Sekolah, Serlah Potensi di Ruang Legar Teratai, Kompleks Ujana Kewangan W.P Labuan telah dipenuhi dengan pelbagai reruai pameran daripada pelbagai unit dan agensi . Selain itu, murid-murid yang pernah mewakili WP Labuan ke peringkat kebangsaan menunjukkan bakat dalam bidang seni seperti tarian, nyanyian solo , bicara berirama, deklemasi sajak dan persembahan istimewa dari guru-guru Tadika Chung Hwa dengan pukulan gendang yang menarik.

Karnival ini juga mengadakan acara kemuncak dengan Majlis Penganugerahan kepada Guru Penolong Kanan HEM dan Guru bimbingan Kaunseling. Murid-murid juga dianugerahkan Anugerah Sahsiah dan Kehadiran Cemerlang. Majlis disempurnakan oleh Tuan Haji Abidin bin Haji Marjan, Pengarah Pendidikan JPNWPL.









Bengkel Penulisan Berita dan Media Tingkat Kemahiran Penulis Berpotensi



Labuan, 15 Oktober 2024 – Jabatan Pendidikan Wilayah Persekutuan Labuan telah menganjurkan bengkel penulisan berita yang bertujuan untuk meningkatkan kemahiran guru dan pegawai dalam menghasilkan penulisan yang informatif dan menarik. Bengkel ini diadakan di Bilik Benua, SSTP, JPWP Labuan dari jam 1.00 petang hingga 5.00 petang.

Bengkel ini disasarkan kepada guru perpustakaan media sekolah dan pegawai dari setiap sektor di Jabatan Pendidikan Labuan. Peserta diberi pendedahan tentang teknik-teknik penulisan berita yang berkesan, termasuk cara menstruktur berita, penggunaan bahasa yang tepat, serta kaedah menarik minat pembaca.

Peserta bengkel diberikan latihan praktikal dan teori oleh penceramah yang berpengalaman dalam bidang komunikasi dan media iaitu Pn Noor Affatizah Sabtu Ketua Bahagian Rancangan Jabatan Penyiaran Negeri WP Labuan. Mereka belajar mengenai cara menyusun berita, penggunaan bahasa yang sesuai, dan pentingnya elemen-elemen seperti latar belakang, fakta, dan pendapat dalam penulisan berita.

Dalam sesi bengkel ini, peserta turut berpeluang untuk berkongsi pengalaman dan bertukar idea mengenai penulisan berita yang berkaitan dengan aktiviti pendidikan di sekolah-sekolah. Penceramah yang dijemput terdiri daripada pakar dalam bidang komunikasi dan media yang berpengalaman.

Ketua Penolong Pengarah Sektor Sumber Teknologi Pendidikan, Jabatan Pendidikan Labuan menyatakan, En Mohamad Pindut berkata “ Saya berharap bengkel ini dapat memberi impak positif kepada semua peserta dalam meningkatkan kualiti penulisan mereka. Dengan kemahiran yang dipelajari, mereka dapat menyampaikan berita mengenai aktiviti dan kejayaan pendidikan dengan lebih berkesan.”

Cikgu Sapri Idris GPM SMK Ranche-Ranche peserta bengkel berpendapat bengkel ini bukan sahaja membantu meningkatkan kemahiran penulisan, tetapi juga bertujuan memperkukuh jaringan kerjasama antara guru dan pegawai di JPWP Labuan.



Pn Noor Affatizah Sabtu penceramah jemputan Bengkel Bengkel Penulisan Berita



Penyampaian cenderamata oleh Ketua Penolong Pengarah Sektor Sumber Teknologi Pendidikan En Mohamad Pindut kepada penceramah jemputan.

Majlis Bicara Wahyu Kementerian Pendidikan Malaysia Siri ke-9/2024



Labuan- Majlis Bicara Wahyu (MBW) Kementerian Pendidikan Malaysia (KPM) siri ke-9 tahun 2024 telah diadakan dengan jayanya di Dewan Kompleks Darul Kifayah, Labuan.

Majlis anjuran Bahagian Pendidikan Islam (BPI) KPM ini diadakan setiap bulan secara bergilir-gilir di semua negeri.

Majlis ini diadakan bagi mengukuh dan memantapkan akidah, penghayatan Islam, sahsiah dan nilai murni dalam kalangan warga KPM di samping membuka minda warga pendidikan melalui sesi perbincangan agama yang sihat dalam usaha mempertingkatkan mutu produktiviti kerja cemerlang

mereka.

Antara pengisian sepanjang MBW ini diadakan ialah bacaan surah Al Kahfi, surah yaasin dan doa yang dipimpin oleh Ustaz Azhan bin Salleh dan Ustaz Muhammad Fakhrurrazi bin Mohd Najakhi.

Slot bicara hadis 40 Imam Nawawi telah disampaikan oleh ustas Syamun bin Yahaya daripada Kolej Matrikulasi Labuan.

Forum bertajuk Akidah Ahli Sunnah Wal Jamaah telah disampaikan oleh Sahibul Fadhilah Dr. Nik Azlan bin Nik Man (Timbalan Mufti), Ustaz Muhammad Shafie bin Abdul Ghani, Jabatan Agama Islam Wilayah Persekutuan (JAWI) manakala ustaz Abdul Aziz bin Abdullah selaku Moderator.

Hadir sama dalam majlis ini Tuan Pengarah Pendidikan, Jabatan Pendidikan Malaysia Tn Hj Abidin bin Marjan, Pengurus Majlis Agama Islam Wilayah Persekutuan Labuan Encik Mohamad Fazdli bin Md Saad, Ketua Penolong Pengarah, Sektor Pembangunan Adab dan Nilai Encik Zamri bin Basir, pegawai-pegawai daripada JPWPL, JAWI, MAIWPL, Pejabat Mufti, Pusat Pungutan Zakat, Kolej Matrikulasi, pentadbir sekolah, guru-guru dan anggota kumpulan pelaksana.

Majlis turut diselitkan dengan aktiviti kuiz kahoot yang menyediakan 20 hadiah.













IHTIFAL LUGHAWI SEKOLAH- SEKOLAH PERINGKAT WILAYAH PERSEKUTUAN LABUAN TAHUN 2024



Labuan, 12 September 2024 – Majlis Penutupan Iftital Lughawi Sekolah-sekolah (ILSS) Kementerian Pendidikan Malaysia Peringkat Wilayah Persekutuan Labuan Tahun 2024 telah diadakan di Sekolah Kebangsaan Bukit Kallam petang tadi.

Iftital Lughawi pada tahun ini dikelolakan oleh Sekolah Kebangsaan Bukit Kallam dengan tema Adab dan Nilai Menjana Karamah Insaniah. Ia melibatkan seramai 203 peserta sekolah rendah, 58 peserta sekolah menengah dan 38 orang juri dengan penyertaan daripada 17 buah sekolah rendah dan 10 buah sekolah menengah. Acara yang dipertandingkan kategori sekolah rendah ialah Kalam Jamaie, Kalam Arabi dan Daie Cilik. Manakala acara sekolah menengah pula ialah Kuiz Bahasa Arab, Kalimatus Sobah, Mimbar Daie. Sekolah Kebangsaan Pekan Satu dan Sekolah Kebangsaan Sungai Bedaun telah dinobatkan sebagai juara keseluruhan kategori sekolah rendah manakala Sekolah Menengah Kebangsaan Mutiara dinobatkan sebagai juara keseluruhan kategori sekolah menengah.





ILSS yang dianjurkan oleh Kementerian Pendidikan ini merupakan satu platform yang amat penting untuk para pelajar kita memperkasa dan memperhalusi penguasaan mereka dalam bahasa Arab. Di sinilah medan untuk menguji bakat para peserta bukan hanya dari segi kefasihan berbahasa tetapi juga dari segi pemahaman budaya, kesenian dan kesusasteraan yang kaya dengan makna.

Perasmian penutupan Ihtifal Lughawi telah disempurnakan oleh Timbalan Pengarah Pendidikan Sektor Perancangan puan Noraini binti Sahbudin yang mewakili Pengarah Pendidikan Wilayah Persekutuan Labuan. Turut hadir hadir dalam majlis ini Ketua Penolong Pengarah Sektor Pendidikan Islam ustazah Kamariah binti Salim, Ketua Penolong Pengarah Sektor Pendidikan Khas Tuan Haji Sahbudin Bin Ag. Muhamad, Ketua Penolong Pengarah Sektor Teknologi Maklumat Puan Hajjah Murniza Binti Mohammad, Guru besar daripada semua sekolah rendah, wakil pengetua, guru-guru

Pendidikan Islam dan Bahasa Arab serta ibu bapa dan penjaga murid.

Semoga peserta yang akan mewakili Wilayah Persekutuan Labuan dalam Ihtifal Lughawi KPM Peringkat Kebangsaan yang akan diadakan di Terengganu pada 24-27 Oktober ini beroleh kejayaan yang cemerlang.





KURSUS KEPAKARAN GURU BIMBINGAN DAN KAUNSELING



WP Labuan, 9 dan 10 September – Sektor Psikologi dan Kaunseling, Jabatan Pendidikan WP Labuan telah menganjurkan Kursus Kepakaran Guru Bimbingan dan Kaunseling serta Kaunselor Matrikulasi yang bertempat di Dewan Seminar Rafflesia, Kompleks Ujana Kewangan.

Objektif kursus ini adalah untuk mewujudkan Kumpulan Guru Bimbingan dan Kaunseling yang berkemahiran dan kompeten sebagai responder pertama di sekolah terhadap isu anti gangguan seksual dan intervensi pencegahan bunuh diri demi memastikan kesejahteraan psikologi warga sekolah.

Kursus kepakaran yang dilaksanakan ini dibahagikan dalam

dua modul, iaitu hari pertama Intervensi Anti Gangguan Seksual dan hari kedua Intervensi Pencegahan Bunuh Diri.



Bertepatan Hari Pencegahan Bunuh Diri Sedunia yang disambut pada setiap 10 September, kursus kepakaran yang diadakan ini adalah satu hari yang amat penting dalam usaha meningkatkan kesedaran mengenai pencegahan bunuh diri.

Jurulatih Utama Kebangsaan yang berkongsi pengetahuan dalam kursus kepakaran ini iaitu En. Ahmad, Kaunselor Pendidikan Negeri Sarawak, Pn. Haslinda, Kaunselor Pendidikan Daerah Papar, En. Rahimen, Kaunselor Pendidikan Daerah Lahad Datu dan En. Rozan, Kaunselor

Pendidikan Daerah Kudat.

Ucuptama perasmian telah disampaikan oleh Timbalan Pengarah Pendidikan Sektor Pengurusan Sekolah Tuan Haji Sawal bin Haji Mohd Salleh.

Hadir sama, Tuan Timbalan Pengarah Sektor Pembangunan Murid, En Ag Marten bin Haji Abd Rahman dan Tuan Ketua Kaunselor Pendidikan Negeri Jabatan Pendidikan Wilayah Persekutuan Labuan, En Sabdin bin Japarudin.



Sesungguhnya penganjuran Kursus Kepakaran ini membuktikan bahawa Jabatan Pendidikan Wilayah Persekutuan Labuan sangat komitmen terhadap kaunselor dan guru-guru bimbingan dan kaunseling, Jabatan Pendidikan Wilayah Persekutuan Labuan terhadap usaha-usaha memartabatkan dan

menyemarakkan budaya mencintai ilmu dan mengamalkan praktik penyampaian perkhidmatan Guru Bimbingan dan Kaunseling serta produktiviti sentiasa pada tahap optimum.